

Edicion Special *Himno y Bandera*

Rufo Wever y Padu Lampe

Compositornan Himno di Aruba

-1952-

En connecion cu nos dia nacional nos ta recorda cu na anja 1952 e musico y compositor **Rufo Wever** hunto cu su gran amigo e musico y compositor **Padu Lampe** a compone e Himno nacional di Aruba.

Inspiracion

A sosode cu na aña 1951, srs. Rufo Wever y Padu Lampe, dos compositor y musico bon conoci na Aruba, a sinti e necesidad pa cuminsa conserva y promove loke nan ta considera di ta e ritmo y melodia tipico di Aruba. Inspira pa e idea aki, conhuntamente, nan a cuminsa cu grabacion y produccion di disco di 78rpm, cual nan a lansa riba mercado di Antillas Hulandes. E compania tabata tin como nomber Padu Records y tabata situa na cas di Rufo Wever na Wilhelminastraat unda un

cantidad masha grandi di composicionnan a wordu graba.

E tempo ey na anja 1952 e idea a nase como no ta tin un cantica na Papiamentu cu por a usa durante aubadenan y otro dianan importante pa Aruba. Tabata tin un cantica na Hulandes cu tabata wordu usa hopi, cu tabata un di cancion existente di Hulanda y cu a pone palabranan na hulandes cantando pa Aruba.

E composicion

A surgi e pregunta si ta traha e composicion den ritmo di marcha of na wals. E solucion tabata facil ya cu por crea e figura di e piesa den un forma cu por toke tanto den ritmo di wals y como den ritmo di marcha. E mes un dia ey e composicion a keda cla y Aruba Dushi Tera a nace. Asina a nase e cantica Aruba Dushi Tera cu

despues a wordu declara Himno di Aruba. Danki na e organisacion activo "De Trupialen", e tempo ey bou direccion di e conocido Frere Alexius, cu a inclui e composicion den nan repertorio, su popularidad a crece. Espontaneamente otro instancia priva y oficial a cuminsa usa Aruba Dushi Tera na ocasionnan di importancia pa nos isla. Na aña 1954 dos di e radio emisoranan a transmiti Aruba Dushi Tera den ritmo di marcha. E compositornan a haya e impresion cu den ritmo di wals e composicion a cai mas na smaak di hopi hende.

Himno oficial di Aruba



1976

Na 1976, Gobierno Insular di Aruba, a instala un comision di seis ciudadano prominente y a-politico di nos comunidad, cu e tarea di conseha Gobierno riba e pregunta, si por haci Aruba Dushi Tera e Himno nacional y den cua ritmo. E comision aki tabata consisti di sra. M. Arends-Croes, sres. R. Odor, J.C. (Padu) Lampe, E. Bennet, H. Booi y J. Wever. Unanimamente e comision den su totalidad a vota pro pa recomenda Aruba Dushi Tera, como Himno nacional y den ritmo di wals. E proposicion a bin dilanti tambe pa añadi un couplet mas. Rufo Wever y Padu Lampe a bin cu un proposicion pa e ultimo couplet y tambe **Hubert (Lio) Booi** a bin cu un proposicion pa e ultimo couplet. E prome frase di e ultimo couplet a bin di e proposicion di Rufo Wever y Padu Lampe y e frase ... cu Dios por guia y conserva su amor pa libertad a bin di Hubert Booi. Tambe Hubert Booi a bin pa cu e idea pa haci e cuminsamento di e cantica un tiki mas largo pa asina e hendenan tin e tempo pa lanta para y duna honor na e Himno. Orquesta di e musico y compositor venezolano **Don Anibal Abreu** a graba e Himno pa prome bez den version di orquesta y ta e

version oficial di e Himno di Aruba. E coro Vivons en Chantant bou di su dirigente sr. **Rufo Odor** a viaha pa Venezuela unda e version official die Himno a wordu graba.

Dia 16 di maart 1976, Gobierno Insular di Aruba, a aproba Aruba Dushi Tera, como Himno oficial di Aruba. Y durante e anochi di 18 maart 1976, pa e acto oficial organisa pa Gobierno Insular di Aruba, den Wilhelmina Stadion pa proclamacion oficial di nos Himno y bandera y den presencia di un multitud di ciudadano presente, **ARUBA DUSHI TERA**, pa di prome biaha a resona oficialmente como Himno oficial di Aruba. Conmoveramente un coro hubenil bou direccion di sra. **Maybeline Arends-Croes**, acompaña pa e orquesta dirigi pa sr. **Joy Kock** a interpreta e Himno. Pa semper e anochi aki lo keda registra den historia di Aruba.

Otro composicionnan hunto di Rufo Wever y Padu Lampe

E dos compositornan aki tin tambe varios otro composicion hunto pa menciona algun: e famoso tumba **Chanita**, y e immortal calypso **Carnaval** di aña 1954.